

फिलिप्पियोंक नाम पौलुसकि चिट्ठी

जब पौलुस रोमी कैद मिं छी उ बखत वील विश्वासियोंक नाम भौत चिट्ठी लेखी। वील फिलिप्पियोंक नाम मिं लै एक चिट्ठी लेखी। यौ हबेर पैली पौलुस फिलिप्पी मिं तब गोछी जब उ मकिदूनिया जाणौछी जो कि यूनानक उत्तर दिशाक तरफ छी। उ बखत वीक दगाड़ सिलास लै छी। यौ द्विनो कैं वां पकड़िबेर जेल मिं खिती गोछी पर परमेश्वर वां लै उनर दगाड़ छी और उं आजाद लै हई। ऐल पौलुस वांक विश्वासियों कैं यौ चिट्ठी लेखणौ।

फिलिप्पियोंक लिजी पौलुसकि प्रार्थना

(फिलिप्पियों १:१-११)

फिलिप्पी नगर मिं रुणिवॉल यीशु मसीक सब विश्वासियोंक लिजी, यीशु मसीक दास पौलुस और तिमोथीक चिट्ठी। हमर पिता परमेश्वर और प्रभु यीशु मसीक किरपा और शांति तुम सबों मिं हो।

जब-जब मी तुमुकैं याद करनू, तब मी तुमर लिजी परमेश्वरक धन्यवाद करनू। और मी तुमर लिजी हमेशा आनंदित हबेर प्रार्थना लै करनू, किलैकि तुम शुरु बे ऐल तलक भलि खबरक परचारक काम मिं हमेरि मधत करनै उणाछा। परमेश्वरल तुमर मन मिं यौ भल काम शुरु करौ, और म्यर पुर भरौस छु कि उं तुमर मन आपण तरफ बढूने रौल। और यीशुक दुबार उण बखत यौ काम पुर है जॉल, और तब तुमर मन बिल्कुल पवित्र बणि जॉल।

तुम सबनक बारि मिं मेरि यौ राय भलि छु किलैकि मी तुमुकैं भौत प्रेम करनू। परमेश्वरक किरपाल तुम सब यौ खाश काम मिं म्यर दगाड़ भागिदार राछा, न केवल उ बखत जब मी जेल मिं छी, बलकिन तब लै जब मी

न्यायालय में भलि खबरक बचाव करणौछी। परमेश्वर केँ लै यौ पत्त छु कि मी तुमुकेँ भौत याद करनू और यीशु मसीक चारि प्रेम लै करनू।

मेरि यौ प्रार्थना छु, कि तुम परमेश्वरक प्रेम, बुद्धि और समझ में हमेशा बढ़नै रओ। जब तुम यस करला, तब तुमुकेँ पत्त लागि जॉल कि जरूड़ी और खाश बात के छन। इसिक तुम यीशु मसीक वापिस उण तलक पाप बे दूर रैबेर निर्दोष साबित रौला। तब जसिक बोट में फल बढुं, उसिकै यीशु मसीक जरियल तुमर जिन्दगी में भाल काम और सोच-विचार बढुं, जैल परमेश्वरक महिमा हो।

यीशुक नाम फैलणल पौलुसकि खुशी

(फिलिप्पियों १:१२-१६)

भाइयो, मी तुमुकेँ आँब यौ बतै दिण चानू, कि जे लै खराब बात म्यर दगाड़ हई, उं भलि खबरक परचारक लिजी भल हई। यैक लिजी कि मी कैद में छूं, महलॉक सब मैस और भौत दुसॉर मैसोंल लै यीशु मसीक बारि में सुणौ। यैक अलावा म्यर बन्दी हुणक कारणल भौत विश्वासी प्रभु में और लै भरौस धरिबेर परमेश्वरक भलि खबरक परचार निडर हबेर सुणूण लागीं। यौ बात सांचि छु कि थ्वाड़ मैस जलनक कारणल परचार करनी, लेकिन दुसॉर मैस दुसरोक भलाइक लिजी प्रेमल यौ काम करनी। उं जाणनी कि मी भलि खबरक तरफदारि करणक लिजी ठैराई छूं। दुसॉर मैस भलाइक मंशाल नै पर यौ मंशाल परमेश्वरक भलि खबरक परचार करनी कि जेल में म्यर लिजी दुःख मुशीबत हो। लेकिन चाहे भल या नक क्वे लै तरिकल हो, पर मसीक परचार तो हुं! यैक लिजी मी मगन छूं।

और मी यैक लिजी लै खुशि छूं किलैकि मी यौ जाणनू कि तुमेरि प्रार्थनाओं और यीशु मसीक आत्माक मधतल म्यर छुटकार ह्वल।

ज्यून या मरी, हम यीशुक छूं

(फिलिप्पियों १:२०-२७)

मेरि मनकि आँश और विश्वास यौ छु कि मी क्वे लै यॉस कामों केँ नि करुं जैक लिजी मिकेँ शर्मिन्दा हुण पड़ो, लेकिन मी पुर हिम्मतल यीशु मसीक महिमा करनै रूं, चाहे मी ज्यून रूं या मरि जूं। किलैकि अगर मी ज्यून छूं, मी यीशुक सेवा करनू, लेकिन अगर मी मरि जूंल, यौ म्यर लिजी और लै

जादे भल छु। अगर मी यौ आड मिं ज्यून रू, तब मी परमेश्वरक लिजी फल दिणी काम करि सकनू, लेकिन मरिबेर मी मसीक पास न्है जूल। यैक लिजी मेरि समझ मिं नि उणय कि मी के बात कैं छांटों। मेरि मंशा छु कि मी मरिबेर मसीक पास न्है जूं, किलैकि म्यर लिजी यौ सबों है जादे भल छु। लेकिन तुमर लिजी म्यर यौ आड मिं ज्यून रुण जादे जरूड़ी छु। यैक लिजी मी जाणनू कि मी ऐल ज्यून रूल और तुम सबनक दगाड़ रूल, जैल तुम सब विश्वास मिं मजबूत हुनै जाओ और यौ कारणल मगन रओ। और जब हम फिर मिलूं, तब तुम और लै जादे खुशि ह्वला कि परमेश्वरल म्यर लिजी के करौ।

निडर हबेर सताव सहण करण चैं

(फिलिप्पियों १:२७-३०)

तुम बस यस करिया कि तुमर चाल-चलन प्रभुक कूणक अनुसार हो। तब चाहे मी तुमर दगाड़ रू या तुमुबे दूर, तुमर बारि मिं बस यौ सुण मिं आओ कि तुम एक मन हबेर परमेश्वरक लिजी इदुक छाउ-छरपट हबेर काम करणाछा कि वील दुसॉर मैस भलि खबर मिं भरौस करो।

और तुम आपण दुश्मनों बे बिल्कुल झन डरिया, किलैकि तुम उनर सताव सहबेर दिखूंछा कि उं हरै दी जॉल, लेकिन तुमुकैं परमेश्वर बचाल। जस दुःख-पीड़ मील फिलिप्पी मिं उठै और आज तलक लै उठूणयूं, उस्सै आँब तुम लै उठूणाछा। किलैकि तुमुकैं न केवल मसीह मिं भरौस करणक, बल्किन वीक लिजी दुःख उठूणक बरदान लै मिली छु।

हमर स्वभाव यीशुक जस दीन हुण चैं

(फिलिप्पियों २:१-११)

यीशु मसीह तुमर मन बढूं और उनर प्रेमल तुमुकैं सुख-चैन मिलुं। तुमर रिश्त पवित्र-आत्माक दगाड़ छु और तुम दुसरों मिं दया और उनुकैं प्रेम करछा। फिर तुम लोग एक मन-चित्त, एक दल और एक जुट हबेर, प्रेमक एक धाँग मिं बंधबेर आओ और इसिक मेरि खुशी पुर करि दियो। तुम मतलबी और घमण्डी नि बणो, लेकिन दयालु बणिबेर दुसरों कैं आपुं हबेर भल समझो। तुम आपण भल नै पर दुसरोंक भलाइक ध्यान धरो। तुम आपण स्वभाव कैं प्रभु यीशु मसीक स्वभावक जस बणै लियो। जबकि उं परमेश्वर छन, फिर लै उनुल आपण यौ हक त्यागिबेर एक सेवा करणी मैस बणि

ग्याय। उनुल आपुं कै दीन बणै ले, और यां तलक हुकुम मानणी बणी कि सूलीक मौत लै सहण करी।

यैक लिजी परमेश्वरल उनुकें सबों है उच्च करौ, जैल उनर आदर मिं स्वर्ग, धरति और अधलोकाँक सब आपण घुन टेको, और प्रभु परमेश्वरक महिमाक लिजी सब मैसों कै यौ कबूल करण पड़ल कि यीशु मसीह प्रभु छन!

दुनी मिं उज्यावक चारि चमकण चैं

(फिलिप्पियों २:१२-१८)

यैक लिजी, हे म्यार भाइयो, जसिक तुम म्यर मौजूद रुण मिं म्यर हुकुम माननै आछा, उ हबेर जादे म्यर नि रुण मिं लै मानिया। तुमुकें मुक्ति मिलि गे, पर आँब तुम परमेश्वर धैं डरिबेर, मेहनत करिबेर आपण काम मुक्ति मिलियक जस करया। किलैकि परमेश्वरै तुमर मनों मिं काम करिबेर तुमुकें आपण मंशाक अनुसार सोचण और करण दिनी।

सब कामों कै बहस और चैं-पैं करीयें बगैर करो, जैल तुमुमिं क्वे दोष नि लागो और तुम पवित्र बणो, और यौ दुनियाँक ट्याड़ और बिगड़ी मैसोंक बीच मिं परमेश्वरक भला नॉनतिन बणो। तुम यौ दुनी मिं उज्यावक चारि चमकिबेर परमेश्वरक जिन्दगी दिणी बचन मिं मजबूतील ठाँड़ रवो, जैल उ दिन जब यीशु मसीह वापिस आल, मी यौ देखिबेर कि तुमर बीच मिं मेरि मेहनत फालतू नि गई मिंकें गर्व ह्वल।

अगर मी तुमर लिजी मरि लै जूँल, तब लै मी आनंदित हूँल। और तुम सबोंल लै म्यर दगाड़ आनंदित हुण चैं।

पौलुस आपण दगडुवोंक बारि मिं बतू

(फिलिप्पियों २:१९-३०)

मिकें प्रभु यीशु मिं यौ बातक भरौस छु, कि मी जल्दी तुमर पास तिमोथी कै भेजुँल, जैल मी तुमर बारि मिं जाणिबेर खुशि है सकुं। म्यर पास वीक अलावा और क्वे यस दुसर मैस नहैं, जकें आपणि चारि तुमेरि फिकर हो। किलैकि भौत आपण फैद देखनी, न कि मसीह यीशुक खोज करनी। लेकिन तुमुकें पत्त छु कि तिमोथील आपुं कै भल साबित करौ। वील भलि खबरक परचार करण मिं मेरि मधत उसिक करी, जसिक एक च्यल आपण बौज्यूक

मधत करुं। यैक लिजी जस्सै मिक्कै पत्त चलल कि म्यर दगाड़ के ह्वल, मी तिमोथी कैं तुमर पास भेजि द्यूंल। और प्रभु मिं मिक्कै पुर भरौस छु, कि मी लै जल्दी तुमर पास ऊंल।

फिर लै मिक्कै यौ जरूड़ी लागणौ कि मी इपाफ्रुदीत कैं तुमर पास वापिस भेजुं। उ तुमर तरफ बे म्यर मधत करणक लिजी आ, और वील म्यर दगाड़ भौत मेहनत करी।

उ भौतै बिमार छी, यां तलक कि उ मरणिवाँल छी। लेकिन परमेश्वरकि दया उमिं है, और मि पर लै कि मिक्कै और दुःख नि हो। आँब जब वील सुण है कि तुमुकैं वीक बिमारीक पत्त छु, उ तुमर दगाड़ भेट करणक लिजी भौत परेशान और उत्सुक रुं। यैक लिजी मी उकैं तुमर पास वापिस भेजुंल, जैल तुम उकैं देखिबेर खुशि है जाओ, और तुमर बारि मिं मेरि फिकर लै कम है जालि। उ तुमर भै छु तुम वीक जोरदार स्वागत करिया, और वीक जाँस मैसोंक जादे इज्जत-खातिर करिया। किलैकि उ मसीक कामक खातिर आपण प्राणों कैं खतरों मिं खितिबेर मरणी छी। वील मिक्कै तुमर तरफ बे यौ मधत करी जो तुम खुद नि करि सकछिया।

भरौस करणल हम धार्मिक ठैरनू

(फिलिप्पियों ३:१-११)

हे म्यर भाइयो, प्रभु मिं हमेशा मगन रओ। मिक्कै उं बातों कैं बार-बार तुमुकैं लिखण मिं के परेशानी न्हैं, किलैकि यैल तुमेर हिफाजत ह्वेलि। गलत शिक्षा दिणी कुकुरों बे, जो सिखूनी कि खतना करण जरूड़ी छु, सावधान रओ। सांचि खतनावॉल तो हम छूं, जो पवित्र आतमाक जरियल परमेश्वरक अराधना करनू। हम मैस और उनर रीतियों मिं भरौस नि करिबेर केवल यीशु मसीक कारणल खुशि छूं।

मी तो दुसर मैसोंक हबेर जादे भरौस आपुं मिं धरि सकछी। म्यर पैद हुणक अठू दिन म्यर खतना हौ। इस्रायली बिन्यामीन जातिक म्यर गोत्र छु, मी एक पक्क यहूदी और कठोर नीमोंक पालन करणी फरीसी दलक धर्म गुरु छी। यां तलक कि अगर क्वे नीमों कैं मानणल धर्मी है सकुं, तब यौ मी छी। मी इतुक जोशिल छी कि मी यीशु मिं भरौस करणियों कैं गलत समझिबेर उनुकैं सतूँछी।

लेकिन यौ बातों कैं, जनुकैं मी पैली भौत खाश मानछी, आँब उं म्यर लिजी बेकार छन, किलैकि आँब मी यीशु मसीक दगाड़ मिलि गोयूं। उनर

लिजी मील उं सब छोड़ि है। मी उं सब नीमों कै मानिबेर आपुं कै धार्मिक नि बणै सकछी, लेकिन यीशु मसीह मिं भरौस करणक कारणल परमेश्वरल मिंकै धार्मिक ठैरा।

बस मी यौ चानू कि यीशु मसीह कै और लै जादे जाणि ल्यूं, और उनर दुबार ज्यून हुणक सामर्थ कै महसूस करूं। और उनरै चारि सताव कै मौत तलक सहबेर उनर दगाड़ भागिदार बणूं। जैल एक दिन मी मौत बे दुबार ज्यून हुण तलक पुजि सकुंल।

परमेश्वरक बातों मिं बढ़ण

(फिलिप्पियों ३:१२-२१)

मी यौ नि कूणय कि मिंकै यौ सब मिलि गो, और मी निष्पाप बणि गोयूं, पर मी अघिल बढ़णयूं, जैल मिंकै उ सब मिलि सको, जैक लिजी यीशु मसील मिंकै आपण हात मिं ली राँखौ।

होय, मिंकै पत्त छु कि ऐल तलक मील यौ सब नि पै राँख। लेकिन मी पैलियाँक बातों कै भुलिबेर, अघिलकि बातों मिं नजर धरिबेर हिटुं। जस एक दोड़णिवाँल जोशल आपण लक्ष्यक तरफ दौड़बेर जां, उसिकै मी लै सिद्द आपण लक्षक तरफ जानू। और यौ परमेश्वरक इनाम छु, जैल मी हमेशाक लिजी यीशुक दगाड़ ज्यून रै सकुंल।

हमुमिंबे जदु पक्क विश्वासी छन, उं यौ बिचार धरो। और अगर यौ बातक लिजी तुमुमिं अलग बिचार हो, तब परमेश्वर तुमुकै यैक बारि मिं लै बताल। जदुक हमुल सिखि हैलौ, आपण चाल-चलन उस्सै बणूण छु।

भाइयो, तुम लै जस मी करनू, उस्सै करो, और उनुकै ध्यानल देखो जो यौ ढडल आपण जिन्दगी बितूनी, जैक नमुन तुम हमुमिं देखछा। किलैकि मील तुमुधै भौत बार पैली लै कौ और आज लै डाड़ मारि-मारिबेर कूणयूं, कि आज लै भौत मैस यीशुक बिरोध मिं छन। आखिरकार इनर विनाश ह्वल, किलैकि उं हर बखत आपण पेटक लिजी सोचनी और आपण बेशर्मिक बातों मिं गरदन उंच करनी, और दुनियाँक चीजों मिं आपण मन लगै राँखनी।

लेकिन हम तो स्वर्गक मैस छूं, जांबे हम आपण मुक्तिदाता प्रभु यीशु मसीक वापिस उणकि बेशबरील इंतजार करणयूं। उं आपण सामर्थल सब चीजों कै आपण बश मिं करि ल्याल, और उं हमर नाशवान आड कै लै आपण महिमावाँल आडक चारि बणै द्याल।

मार्गदर्शन

(फिलिप्पियों ४:१-६)

हे म्यर प्रिय भाइयो, तुम जनर बारि मिं मिक्कै भौत गर्व और आनंद छु, मिक्कै तुमर भौतै निशास लागि रौ। तुम सब प्रभु मिं इसिकै भरौस करनै रया।

मी यूओदिया और सन्तखै द्विवै स्यैणियों धै गुजारिश करनू कि तुम झगड़ नि करिबेर प्रभु मिं एक हबेर रओ। म्यर दगाड़ काम करणी, मी तुधै लै बिनती करनू, कि तुम उनरि मधत करो। किलैकि उनुल म्यर दगाड़ मेहनत करिबेर भलि खबर फैलूणक काम करौ, और उनर नाम जीवनक किताब मिं लेखि छु।

तुम सब प्रभु मिं आनंदित रओ। मी फिर कूनू, आनंदित रओ! तुम सब मैसोक दगाड़ भल व्यहवार करो, और याद धरो कि प्रभु यीशु जलदी उणी छन। के लै बातक चिन्ता नि करो, लेकिन हरेक बात मिं प्रार्थना और बिनती धन्यवादक दगाड़ परमेश्वरक सामण धरो। और परमेश्वरक तरफ बे मिलणी शांति जो समझ हबेर दूर छु, तुमर दिल-दिमाग कै यीशु मसीह मिं हमेशा समाइबेर धरि राखॉल।

भाइयो, उ बातोंक तरफ ध्यान लगाओ जो सांचि, आदरणीय, न्याय, पवित्र, भली, और तारीफ करणक लैक छन। बस उनुमिं आपण मन लगाई करो। जे ले तुमुल मिधै सिखौ-सुणौ और मी मिं देखि रॉखौ, उनरै अनुसार करो। और परमेश्वर जो शांतिक छवाई छु, उं तुमर दगाड़ रौल।

परमेश्वरक जरियल हम सब सह सकनू

(फिलिप्पियों ४:१०-२०)

मी प्रभु कै धन्यवाद करिबेर भौत खुशि छूं कि इदुक दिनोंक बाद तुमुल म्यर लिजी भेट भेजौ। पक्क तुम पैली लै म्यर लिजी चिन्ता करछिया, लेकिन उकै देखूणक मौक नि मिल। मी आपण क्वे कमी-पेशीक कारणल यौ नि कूणय, किलैकि जे लै म्यर पास छु मील उमिं खुशि रुण सिखि है। मिं दीन-हीन हालत और सम्पन्नता मिं लै रुण जाणनू, और हर बात हर परिस्थिति मिं संतुष्ट हुण सिखि है। परमेश्वर जो मिक्कै ताकत दिंनी, उनर जरियल मी सब चीज सह सकनू।

फिर लै तुमुल भल करौ, कि दुखक बखत मेरि मधत करी। और जब तुमुल पैली भलि खबर सुण हैछी, तब लै तुमुल मेरि मधत करी, जबकि और

क्वे लै दुसर विश्वासी समुदायल नि करि। और जब मी थिसलुनिका मिं छी, तब लै तुमुल बार-बार मेरि जरवतक समान भेजौ।

यौ बात न्है कि मी दान चानू, बल्किन यौ चानू कि तुमुकैँ यैक बदाव खूब आशीश मिलो। आँब यैक लिजी कि तुमुल इपाफ्रुदीतक हात यौ दान भेजौ, जतुक लै मिक्कैँ जरवत छी, यै हेबेर जादे मिक्कैँ मिलौ। तुमर दान परमेश्वरक लिजी एक खुशबुदार बलिदान छु, जैल उं खुशी हुंनी। और परमेश्वर तुमर हर जरवतों कैं हमार यीशु मसीक धन-दौलतल पुर करॉल, जो महिमा सहित उनर पास छु।

यौ बात पक्कि छु कि हमर पिता परमेश्वरक महिमा हमेशा-हमेशा तलक हुनै रओ!

आखिरी बात

(फिलिप्पियों ४:२१-२३)

जो लै यीशु मसीक विश्वासी छन, उनुकैँ म्यर तरफ बे पैलाग कया। और जो म्यर दगाड़ छन, उं लै तुमुकैँ पैलाग कूणई। होय, यांक सब विश्वासी मैस, खाश कर सम्राटॉक महल मिं काम करणी, तुमुकैँ पैलाग कूणई।

प्रभु यीशु मसीक दया तुमुमिं रओ।